

Sekaraia

Kapas akom

I. Iten ei puk: Sekaraia, pun mine a mak lon künaan, an kewe afalafal me an kewe kapasen osuni. Wewen ei it Sekaraia: Ewe Samol mi Lapalap a chechemeni.

II. Chon makei ei puk: Sekaraia

III. Itelapemongen ei puk: Ach angang esap fis ren pöchökül, esap pwal fis ren manaman, nge epwe fis ren Ngünün Kot.

IV. Kapas aüchean ei puk: Kot a nemeni fanüfan, iei mine ekewe chon Juta mi chüen manau repwe apilükülüköch.

V. Masouen ei puk Sekaraia: Ei puk Sekaraia a kinikinitiu lon 2 kinikin:

1. Sopun 1-8: Än ewe soufos Sekaraia kapasen osuni me künaan lon ewe fansoun seni ewe ier 520 tori 518 mwen Kraist (B.C.). A pwärätä usun kaüsefälin ewe telinimw Jerusalem me ewe imwenfel, usun än nöün Kot kewe aramas repwe limöch, pwal usun ewe fansoun ewe Chon Amanau epwe feito.
2. Sopun 9-14: Kochufengenin ekoch pworaus usun ewe Chon Amanau ra witiwiti, me ewe apwüngün lesopolan.

VI. Tettelin masouen ei puk:

Ekewe kapasen fön me apilükülüköch 1.1–8.23
Kot epwe apwüngü chon ekewe mwü mi nom ünükün Israel 9.1-8

Än ekewe aramas feiöch me nonom fän kinamwe lon ekewe fansoun repwe feito 9.9–14.21

Kapasen tüngor pwe aramas repwe liwin ngeni Kot

1.1-6

¹ Iwe, lon aruuen ierin mwün Tarius, lon ewe awaluen maram, ewe Samol mi Lapalap a kapas ngeni ewe soufos Sekaraia nöün Perekia we mwän, nge Perekia nöün Ito. ✧ ² Iwe, ewe Samol mi Unusen Manaman a tini Sekaraia pwe epwe üreni ekewe aramas, “Ngang ewe Samol mi Lapalap üa fokun song ngeni ämi kewe lewo. ³ Nge iei üpwe ürenikemi: Oupwe liwin ngeniei, nge ngang üpwe liwin ngenikemi. ⁴ Ousap apirü ämi kewe lewo. Ekewe soufos me lom ra üreniir fän aloi pwe repwe ükütiu seni ar kewe lapalapangau me föföör mi ngau. Nge ir resap aüselinga ika aleasochisiei. Ngang ewe Samol mi Lapalap üa kapas. ⁵ Ikafa ir ämi kewe lewo? Ifa usun, ekewe soufos ra manau tori feilfeilachök? ⁶ Ifa usun, ai kewe kapas me ai kewe allük üa allük ngeni nei kewe chon angang ekewe soufos resap küw ämi kewe lewo? Iei mine ra ekieksefäl o üra: Usun mine ewe Samol mi Unusen Manaman a ekiekietä pwe epwe föri ngenikem fän iten äm kewe lapalap me föföör, iei usun a föri ngenikem.”

Künään ewe soufos usun ekewe oris

1.7-17

⁷ Iwe, lon aruuen ierin mwün Tarius, lon rüe me rüanün ränin ewe engol me aeuin maram,

✧ **1:1:** Esr 4.24–5.1; 6.14

iei ewe maram Sepat, ewe Samol mi Lapalap a kapas ngeni ewe soufos Sekaraia. Iwe, Sekaraia a üra, ⁸ “Lepwin ewe a wor künaei. Üa küna eman mwän mi wawa eman oris mi par. A nom lein ekewe mwoosor lon ewe lemol mi chökis. Nge lükisökürün a wor pwal ekoch oris mi par, tiketikepar me pwech. ☆ ⁹ Mürin üa ais, ‘Met wewen ekei oris, ai samol?’ Nge ewe chon läng mi kapas ngeniei a üreniei, ‘Üpwe aiti ngonuk met wewen.’ ¹⁰ Mürin ewe mwän mi nom lein ekewe mwoosor a pälüeni, ‘Ikkeiir ekewe ewe Samol mi Lapalap a tinireto pwe repwe raunei fanüfan.’ ¹¹ Iwe, ra üreni nöün ewe Samol mi Lapalap we chon läng mi nom lein ekewe mwoosor, ‘Äm aia raunei fanüfan o küna pwe unusen fanüfan a mosonoson o kinamwe.’ ¹² Mürin, nöün ewe Samol mi Lapalap we chon läng a üra, ‘Ai Samol mi Unusen Manaman, inet kopwe eäni ümömöch ngeni Jerusalem me ekewe telinimwen Juta, pun ka song ngeniir lon ekei fik ier?’ ¹³ Iwe, ewe Samol mi Lapalap a kapas pwetete me aururu ewe chon läng mi piin kapas ngeniei. ¹⁴ Mürin, ewe chon läng a üreniei pwe üpwe asilefeili alon ewe Samol mi Unusen Manaman, ‘Ngang üa fokun echeni o ekimongei Jerusalem me Sion. ¹⁵ Nge üa fokun song ngeni chon ekewe mwü mi nom fän kinamwe. Pun lupwen üa ekis song ngeni nei aramas, ir ra alapala ar afeiengaueer. ¹⁶ Iei mine üa liwinla Jerusalem pwe üpwe pwäri ai tong ngeni. Imwei epwe käüsefäl lon, pwal Jerusalem epwe käüksefäl,’ iei alon ewe Samol mi Unusen

☆ **1:8:** Pwär 6.4; 6.2

Manaman. ¹⁷ Kopwe pwal asilefeili alon ewe Samol mi Unusen Manaman, ‘Ai kewe telinimw repwe ursefäl ren wöü, nge ngang ewe Samol mi Lapalap üpwe aururusefäli Sion o filisefälietä Jerusalem.’ ”

Künään ewe soufos usun ekewe mächän man me ekewe chon angang ngeni mächä

1.18-21

¹⁸ Mürin a pwal wor künaei. Üa küna fofoch mächän kow. ¹⁹ Iwe, üa aisini ewe chon läng mi piin kapas ngeniei, “Met wewen ekei mächä?” Nge i a pälüeniei, “Ikkei ekewe mwün fanüfan ra atoropasafeili chon Juta, chon Israel me chon Jerusalem.” ²⁰ Mürin, ewe Samol mi Lapalap a aküna ngeniei föman chon angang ngeni mächä. ²¹ Iwe, üa ais, “Met ir repwe föri?” Nge a pälüeniei, “Ekewe mwü ra atoropasafeili chon Juta, pwe esap wor eman aramas a tongeni chimwetä. Nge ekei chon angang ngeni mächä ra feito pwe repwe eniwa o ataela ekewe mwü mi ü ngeni ewe fanü Juta o atoropasa aramasan.”

2

Künään ewe soufos usun eman mwän mi kamwöch efoch selin aükük

2.1-5

¹ Iwe, a pwal wor künaei. Üa küna eman mwän mi amwöchü efoch selin aükük lepöün. ² Mürin üa aisini, “Ia kopwe feila ie?” Nge i a pälüeniei, “Üpwe feila Jerusalem pwe üpwe aükü ükükün chölapan me langataman.” ³ Mürin, ewe chon läng mi piin kapas ngeniei a kaneto, nge pwal eman chon läng

a kaneto pwe epwe churi. ⁴ Iwe, a üreni, “Kopwe säla ren ewe alüal mi kamwöch ewe selin aükük o üreni, ‘Jerusalem epwe eu telinimw esap wor tittin pokiten chomongun ekewe aramas me man mi nom lon.’ ⁵ Nge iei alon ewe Samol mi Lapalap, ‘Ngang üpwe eu tit seni ekkei mi pwelifeili Jerusalem, üpwe pwal eu ling fän itan me lon.’”

Ekewe chon oola ra kö
2.6-13

⁶ Iei alon ewe Samol mi Lapalap ngeni nöün aramas, “Üa atoropasakemi ngeni lesopun fanüfan me rüanü. Nge iei oupwe etto, oupwe etto! Oupwe sü seni ewe fanü efeng. ⁷ Oupwe etto, oupwe sü ngeni Sion, ämi mi nom lon Papilon.” ⁸ Iwe, iei alon ewe Samol mi Unusen Manaman, a tiniei ren an ling ngeni chon ekewe mwü mi angei pisekimi fän pöchökül, pun chokewe mi atapakemi ra atapa fituken lon mesan, ⁹ “Ngang üpwe aü pei o fiu ngeniir, nge chokewe mi angang ngeniir me lom repwe angei pisekir fän pöchökül.” Lupwen epwe fis ei, oupwe silei pwe ewe Samol mi Unusen Manaman a tiniei. ¹⁰ Iei alon ewe Samol mi Lapalap, “Oupwe köl o meseik, ämi chon Sion, pun ngang üpwe feito o imweimw lefilemi.” ¹¹ Iwe, lon ewe rän, chomong chon ekewe mwü repwe feito ren ewe Samol mi Lapalap o wiliti nöün aramas. Iwe, i epwe imweimw lefilemi, nge ämi oupwe silei pwe ewe Samol mi Unusen Manaman a tinieito remi. ¹² Iwe, ewe Samol mi Lapalap epwe fanüeni Juta pwe lenian lon ewe fanü mi pin, epwe pwal filisefäli Jerusalem.

¹³ Oupwe mosonosonola fän mesen ewe Samol mi Lapalap, ämi aramas meinisin, pun i a feito seni lenian mi pin.

3

Künään ewe soufos usun Josua ewe souasor mi lap

3.1-10

¹ Mürin, Kot a aküna ngeniei Josua ewe souasor mi lap mi ütä fän mesen nöün ewe Samol mi Lapalap chon läng, nge Satan a ütä lepelifichin Josua pwe epwe atipisi. ✧ ² Iwe, nöün ewe Samol mi Lapalap we chon läng a üreni Satan, “Ewe Samol mi Lapalap epwe apwünguk, Satan. Ewe Samol mi Lapalap mi filätä Jerusalem epwe apwünguk. Ifa usun, ätei esap wewe ngeni efoch wes eman a atowu seni ekkei?” ✧ ³ Iwe, Josua a ütä fän mesen ewe chon läng, nge a üföüf üf mi limengau. ⁴ Iwe, ewe chon läng a üreni ekewe chon künö mi ütä me mwan, “Oupwe pwiliti seni ei mwän ekewe üf mi limengau.” Nge a apasa ngeni Josua, “Nengeni, üa angei senuk om tipis, nge üpwe aüföüfa ngonuk üf mi mürina.” ⁵ A pwal üreniir, “Oupwe aimweimwa ngeni eu akkau mi limöch.” Iei mine ra aimweimwa ngeni eu akkau mi limöch o aüföüfa ngeni ekewe üf mi limöch. Nge nöün ewe Samol mi Lapalap chon läng a ütä ünükün.

⁶ Iwe, nöün ewe Samol mi Lapalap we chon läng a üreni Josua, ⁷ “Iei alon ewe Samol mi Unusen Manaman: Are kopwe aleasochisi ai kewe allük o föri ai kewe angang üa awisa ngonuk, mürin

✧ **3:1:** Esr 5.2; Pwär 12.10 ✧ **3:2:** Jut 9

kopwe nemenem me lon imwei o tümwünü ai kewe leni ünükün. Üpwe pwal mwüt ngonuk pwe kopwe nom lon eu leni me lein ekewe chon läng mi ütã ikei. ⁸ Kopwe aüseling, en Josua ewe souasor mi lap, en me chiechiom kewe mi nom reöm, ämi eu asisilen feiöch epwe war: Üpwe emwenato nei we chon angang itan Ewe Palan. ☆ ⁹ Üa isetiu fän mesen Josua eföü chök fau mi wor fisu lepekin. Üpwe ruputi och kapas won, nge lon eu chök rän üpwe amoela än chon ewe fanü tipis. ¹⁰ Lon ewe fansoun iteiten eman me eman me leimi epwe kökkörato chon arun pwe epwe mot ren fän an irän wain me an irä fik fän kinamwe, iei alon ewe Samol mi Unusen Manaman.” ☆

4

Ewe lenien atittin me ekewe irä olif

4.1-14

¹ Iwe, ewe chon läng mi piin kapas ngeniei a feitosefäl o apwöküei, usun eman a apwökü eman seni an möür. ² Iwe, a aisiniei, “Met ka küna?” Nge üa pälüeni, “Üa küna eu lenien atittin seni kolt, nge mi wor eu sepi fän iten noppuk a nom won. Mi pwal wor fisu lamp won ewe lenien atittin, nge fisu paip ra feila ngeni ekewe lamp. ³ Iwe, a wor ruofoch irä olif ünükün ewe lenien atittin, efoch a nom pelifichin, nge efoch a nom pelimöngün.” ☆ ⁴ Mürin üa aisini ewe chon läng mi piin kapas ngeniei, “Met wewen ekei mettoch, ai samol?” ⁵ Nge ewe chon läng a aisiniei, “Kosap

☆ **3:8:** Jer 23.5; 33.15; Sek 6.12 ☆ **3:10:** Mik 4.4 ☆ **4:3:** Pwär 11.4

silei wewen ekei mettoch?” Iwe, ngang üa pälüeni, “Apwi, ai samol.” ⁶ Mürin, ewe chon läng a üreniei, “Tei alon ewe Samol mi Lapalap ngeni Serupapel: Esap fis om angang ren pöchökül, esap pwal fis ren manaman, nge epwe fis ren Ngüni. Ngang ewe Samol mi Unusen Manaman üa kapas. ✧
⁷ Are ekewe osukosuk repwe tekia usun chuk, repwe wiliti maasies me mwom. En Serupapel kopwe försefäli ewe Imwenfel, nge lupwen kopwe amasalong ewe föün amüchülan lon lenian, ekewe aramas repwe kökkö fän leüömong, ‘Feiöch, feiöch epwe nonom won.’ ” ⁸ Iwe, ewe Samol mi Lapalap a pwal kapas ngeniei, ⁹ “Serupapel a föri longo-longun ei Imwenfel, i epwe pwal awesala. Are epwe fis ei, nei aramas repwe silei pwe ngang ewe Samol mi Unusen Manaman üa tinuketo rer. ¹⁰ Iö kana mi esita ewe rän, lupwen ewe angang a popuetä, pun a kükün, repwe meseik, lupwen repwe küna pwe Serupapel a sopwela le aüetä ewe Imwenfel.” ✧

Iwe, ewe chon läng a üreniei, “Ekei fisu lamp mesen ewe Samol mi Lapalap mi nenefetal won unusen fanüfan.” ¹¹ Mürin üa aisini ewe chon läng, “Met wewen ekewe ruofoch irä olif mi nom pelifichin me pelimöngün ewe lenien etittin?” ✧ ¹² Üa pwal aissefäl, “Met wewen ekewe ruofoch palen irä olif mi nom ünükün ekewe ruofoch paip seni kolt, ewe ia ewe noppuk a niniwu me ie?” ¹³ Iwe, a aisinie, “Kosap silei wewen ekei mettoch?” Nge üa pälüeni, “Apwi, ai samol.” ¹⁴ Mürin a üreniei, “Ikkeiir ekewe ruoman mwän mi kepit ra angang

✧ 4:6: Esr 5.2 ✧ 4:10: Pwär 5.6 ✧ 4:11: Pwär 11.4

ngeni ewe Samolun unusen fanüfan.”

5

Künään ewe soufos usun ewe toropwe mi äs

5.1-4

¹ Üa netäsefäl o küna echö toropwe mi äs. ² Iwe, ewe chon läng a aisiniei, “Met ka küna?” Nge ngang üa pälüeni, “Üa küna echö toropwe mi äs, langataman a ükükün ilik fiit, nge chölanan ükükün engol me limu fiit.” ³ Mürin, a üreniei, “Iei ewe anümamau epwe feitiu won unusen ewe fanü a mak lon ei toropwe. A mak won ewe epek pwe meinisin mi solä repwe kärila, nge pwal won ewe epek a mak pwe meinisin mi akapelmwäl repwe kärila. ⁴ Ewe Samol mi Unusen Manaman a apasa pwe epwe tinato ewe anümamau. Epwe tolong lon imwen ewe chon solä, pwal lon imwen ätewe mi akapelmwäl fän itan. Iwe, epwe nonom lon imwer o ataretiu, epwe ataela ekewe irä me fau.”

Künään ewe soufos usun ewe fefin mi nom lon eu pasikit

5.5-11

⁵ Mürin, ewe chon läng mi piin kapas ngeniei a feito o üreniei, “Kopwe netä o nengeni ei mettoch mi feito.” ⁶ Nge üa aisini, “Met ei?” Iwe, a pälüeniei, “Iei eu pasikit a aliosunätä än aramasen ewe fanü tipis.” ⁷ Iwe, ewe pasikit a wor öppüngün seni pilom. Nge lupwen üa nengeni, ewe öppüng a suk, nge mi wor eman fefin a mot lon ewe pasikit. ⁸ Iwe, ewe chon läng a apasa, “Ei fefin a aliosunätä föföringau.” Iwe, a tinalong ewe fefin lon ewe pasikit o apüngätü won ewe öppüng seni pilom.

⁹ Mürin üa netä o küna ruoman fefin ra ässito fän pöökässir ren pöpön asepwäl. Nge pöökässir ra wewe ngeni pöökässin öröpwech. Iwe, ra ekietä ewe pasikit o ässila fan. ¹⁰ Mürin üa aisini ewe chon läng mi piin kapas ngeniei, “Ia ra uweela ie ewe pasikit?” ¹¹ Iwe, a üreniei, “Ra uweela ngeni ewe fanü Pabilon pwe repwe aüetä eu imwenfel fän itan ikenan. Nge lupwen ewe imw epwe wes, repwe anomu ewe pasikit lon lenian.”

6

Künaen ewe soufos usun ekewe fofoch woken

6.1-8

¹ Iwe, üa netäsefäl o küna fofoch woken ra feito me lefilen ruu chuk, nge ekewe chuk ra seni piras. ² Iwe, orisin ewe aefochun woken ra parapar, orisin ewe aruofochun woken ra chol, ☆ ³ orisin ewe aülüföchun ra pwech, nge orisin ewe afoföchun woken ra tiketik. Ir meinisín ra fokun pöchökül. ☆ ⁴ Mürin üa aisini ewe chon läng mi piin kapas ngeniei, “Met wewen ekei woken, ai samol?” ⁵ Nge ewe chon läng a pälüeniei, “Ikkeiir ekewe föman ngün seni läng mi towu seni fän mesen ewe Samolun unusen fanüfan. ☆ ⁶ Ewe woken mi chol orisin a feila ngeni ewe fanü efeng, ewe mi pwech orisin a feila ngeni ewe fanü lotou, nge ewe mi tiketik orisin a feila ngeni ewe fanü ör.” ⁷ Lupwen ekewe oris mi fokun pöchökül ra towu, ra fokun pacheu ar repwe feila raunei fanüfan. Iwe, ewe chon läng a üreniir, “Oupwe feila raunei fanüfan.” Iei mine ra feila raunei fanüfan. ⁸ Mürin, ewe chon läng a kapas leüömong

☆ **6:2:** Pwär 6.4-5 ☆ **6:3:** Pwär 6.2 ☆ **6:5:** Pwär 7.1

ngeniei, “Ekewe oris mi feila ngeni ewe fanü efeng ra amanasösöütü ään ewe Samol mi Lapalap song.”

Epa mwärämwär fän iten Josua

6.9-15

⁹ Iwe, ewe Samol mi lapalap a üreniei, ¹⁰ “Kopwe angei silifer me kolt seni ekewe chon oola iter Heltai, Topia me Jetaia, ir ätekewe mi liwinto seni Papilon. Lon ewe chök ränin kopwe feila lon imwen Josia nöün Sefania we mwän. ¹¹ Kopwe föri epa mwärämwär seni ewe silifer me kolt ra ngonuk o amwärämwärätä won möküren Josua ewe souasor mi lap nöün Jehosatak we mwän. ¹² Iwe, kopwe üreni, ‘Tei alon ewe Samol mi Unusen Manaman: Nengeni, iei i ewe mwän mi iteni Ewe Palan. Epwe märitä seni lon lenian, epwe pwal aüsefälietä Imwenfelin ewe Samol mi Lapalap. ☆ ¹³ I ätewe epwe aüetä ewe Imwenfelin ewe Samol mi Lapalap o küna meninin me ren aramas usun eman king, epwe mot won an lenien motun king o nemeni nöün aramas. Epwe wor eman souasor ünükün. Iwe, repwe angangfengen lefiler fän kinamwe.’ ¹⁴ Nge ewe mwärämwär epwe nom lon Imwenfelin ewe Samol mi Lapalap pwe eu pisekin achem fän iten Heltai, Topia, Jetaia me Josia nöün Sefania we mwän.”

¹⁵ Iwe, chokewe mi nom lon fanü toau repwe feito o alilis le aüetä Imwenfelin ewe Samol mi Lapalap, nge ämi oupwe silei pwe ewe Samol mi Unusen Manaman a tinieito remi. Ei epwe fis, are oupwe wesewesen aleasochis ngeni alon ewe Samol mi Lapalap ämi we Kot.

☆ **6:12:** Jer 23.5; 33.15; Sek 3.8

7

Kot a apwüngü sokun echikefel mi fis fän pomwan chök

7.1-7

¹ Lon aruanün ierin mwün ewe king Tarius, lon arüanün ränin ewe atiuen maram, iei ewe maram Kislef, ewe Samol mi Lapalap a kapas ngeni Sekaraia. ² Lon ewe fansoun ekewe aramasen Petel ra tinala Sareser me Rekem-melek fiti aramasen ren imwenzelin ewe Samol mi Unusen Manaman, pwe repwe tüngor ngeni ewe Samol mi Lapalap pwe epwe ümömöch ngeniir. ³ Repwe pwal aisini ekewe souasor me ekewe soufos, “Ifa usun, äm aipwe sopwela le ngüngüres me echikefel fän iten talan ewe Imwenzelin lon ewe alimuen maram, usun äm aia piin föföri lon chomong ier?”

⁴ Mürin, ewe Samol mi Unusen Manaman a kapas ngeniei, ⁵ “Kopwe üreni aramasen ewe fanü meinisin, pwal ekewe souasor: Lupwen oua echikefel me ngüngüres lon alimuen me afisuen maram lon ekei fik ier, ifa usun, oua wesewesen echikefel fän itei? ⁶ Nge lupwen oua mongö o ün, ifa usun, ousap mongö o ün fän püsin itemi chök?” ⁷ Ifa usun, sap ikkei alon ewe Samol mi Lapalap ekewe soufosun lom ra asilefeili, lupwen Jerusalem a so o wöümong fiti ekewe telinimw pwelin ünükün, pwal lupwen ewe fanü ör me ewe fanü lotou mi maasies a so?

Ekewe aramas ra oola pokiten ar lükümach

7.8-14

⁸ Iwe, ewe Samol mi Lapalap a kapas ngeni Sekaraia pwe epwe üreni ekewe aramas, ⁹ “Me lom üa allük ngeni nei aramas, ‘Oupwe eäni kapwüng

fän let, oupwe kirikiröch o ümöömöch ngeni en me pwin. ¹⁰ Ousap ariaföüü ekewe fefin mi mä pwülüer, ekewe mi mäsen, ekewe chon ekis ika ekewe chon wöüngau. Esap wor eman epwe ekiekietä lon letipan och mi ngau ngeni pwin.’ ¹¹ Nge ir resap mochen rongorong, ra kulu sökürür o pinei selinger pwe resap tongeni rongorong. ¹² Ra apöchöküla leluker pwe a pöchökül usun fau, pwe resap rongorong ekewe allük me ekewe kapas, ngang üa tini ngeni Ngüni, nge ekewe soufosun lom ra asile ngeni ekewe aramas. Iei popun ngang ewe Samol mi Unusen Manaman üa fokun lingersingeritiir. ¹³ Lupwen üa kapas, ir resap mochen rongorong, iei mine lupwen ir repwe iotek, ngang üsap mochen rongorong. ¹⁴ Iwe, üa atoropaserela lein chon ekewe mwün lükün meinisin, usun eu mölümöl a atoropasa mettoch, nge ewe fanü ra likitala a pönüla, pwe esap wor eman a tongeni nonom lon. Iei usun ewe fanü mi mürina a pönüla.”

8

Kot a pwon pwe Jerusalem epwe kaiüsefäl

8.1-23

¹ Iwe, ewe Samol mi Unusen Manaman a kapas ngeniei, ² “Üa ekipwichi ai üpwe alisi Jerusalem, pun üa fokun echeni aramasan. Lon ai echeniir üa song ngeni chon oputeer.” ³ Iei alon ewe Samol mi Lapalap, “Üpwe liwinsefäliti Sion o imweimw lon Jerusalem. Iwe, Jerusalem epwe iteni ewe telinimw mi let, nge chuki epwe iteni ewe chuk mi pin.” ⁴ Iei alon ewe Samol mi Unusen Manaman,

“Chinlap mwän me chinlap fefin repwe motsefäl lon ekewe lenien mwicheich lon Jerusalem, eman me eman epwe wokukuni pokiten an chinlap. ⁵Nge ekewe alen ewe telinimw repwe ur ren ät me nengin mi urumot lor.” ⁶Iei alon ewe Samol mi Unusen Manaman, “Are ei epwe amwarar ngeni ekewe aramas mi chüen manau lon ei fansoun, ifa usun, epwe pwal amwarar ngeniei?” ⁷Iei alon ewe Samol mi Unusen Manaman, “Üpwe amanau nei aramas seni ewe fanü ötiu, pwal seni ewe fanü lotou. ⁸Üpwe emwenireto pwe repwe imweimw lon Jerusalem. Iwe, ir repwe nei aramas, nge ngang üpwe ar Kot o nemeniir fän allükülük me pwüng.”

⁹Iei alon ewe Samol mi Unusen Manaman, “Ämi mi rongorong ekei kapas lon ekei rän seni ekewe soufos mi nom lon ewe rän, lupwen longolongun ewe Imwenfel a för, oupwe apöchökülakemi pwe ewe Imwenfel epwe kaüsefälitä. ¹⁰Pun mwen ekana rän esap wor mön än eman aramas angang ika än eman man angang, esap pwal wor eman a tongeni föri an angang fän kinamwe pokiten chon oputan. Pun üa föri pwe aramas repwe fitikokofengen. ¹¹Nge iei üsap chüen föri ngeni ekei aramas mi chüen manau, usun mine üa piin föri me lom. ¹²Aramas repwe amwora pwükil fän kinamwe. Epwe wor uän ewe irän wain, masouen lon pwül epwe märöch, nge läng epwe apüngätü amurenipwin. Üpwe awora ekei feiöch meinisin ngeni ekei aramas mi chüen manau, pwe repwe eäniir. ¹³Ämi chon Juta me chon Israel, chon ekewe mwü ra piin eänikemi apööpö lon ar kapasen ottek.

Nge iei üpwe amanauakemi pwe aramas repwe eänikemi apööpö lon ar kapasen feiöch. Ousap niuokus, nge oupwe apöchökülakemi.” ¹⁴ Iei alon ewe Samol mi Unusen Manaman, “Lupwen ämi kewe lewo ra asongaei, üa ekiekietä pwe üpwe afeiengaeer, nge üsap piitela. ¹⁵ Nge iei üa pwal ekiekietä pwe üpwe afeiöchü Jerusalem me ekewe chon Juta lon ekei rän. Iei mine ousap niuokus. ¹⁶ Ikei ekewe föföör oupwe föriir: Oupwe kapas wenechar lefilemi, oupwe eäni kapwüng fän pwüng pwe epwe fis kinamwe. ✧ ¹⁷ Ousap ekiekin sorongau lon lelukemi eman ngeni eman, ousap pwal sani akapelmwäl. Pun ekei föföör meinisín üa oput,” iei alon ewe Samol mi Lapalap.

¹⁸ Iwe, ewe Samol mi Unusen Manaman a pwal kapas ngeniei pwe üpwe üreni ekewe aramas, ¹⁹ “Ekewe ränin echikefel oua eäni lon arüanün maram, alimuen maram, afisuen maram me aengolun maram repwe wiliti fansoun pwapwa me mwänek me ränin kametip mi apwapwa ngeni chon Juta. Iei mine oupwe sani let me kinamwe.”

²⁰ Iei alon ewe Samol mi Unusen Manaman, “Epwe war eu fansoun pwe chon ekewe mwü me chokewe mi imweimw lon chomong telinimw repwe feito Jerusalem. ²¹ Chon eu telinimw repwe feila ren pwal chon eu o üra, ‘Ousipwe feila pwe sipwe fel ngeni ewe Samol mi Unusen Manaman o tüngor ngeni pwe epwe ümöümöch ngenikich. Iei sipwe le feila.’ ²² Chomong aramas me mwü mi pöchökül repwe feito Jerusalem pwe repwe fel ngeni ewe Samol mi Unusen Manaman, repwe pwal tüngor ngeni pwe epwe ümöümöch ngeniir.

✧ 8:16: Ef 4.25

²³ Lon ekana rän engol mwän seni ekewe mwü mi sokola ar kapas repwe amwöchü lepwülün üfen eman chon Juta o üra, ‘Kose mochen kopwe mwüt ngenikem pwe aipwe etikemi, pun äm aia rong pwe Kot a etikemi.’ ”

9

Än Kot kapwüing won chon ekewe mwü mi nom ünükün Juta

9.1-8

¹ Iei än ewe Samol mi Lapalap kapasen apwüing ngeni ewe fanü Hatrak, a pwal nonom won ewe telinimw Tamaskus. Iwe, mesen ekewe aramas meinisin pwal mesen chon ekewe ainangen Israel meinisin ra netä ngeni ewe Samol mi Lapalap. ✧

² Kot a pwal eäni kapasen apwüing ngeni Hamat mi nom won kiännin Hatrak, pwal ngeni ekewe telinimw Tirus me Siton, inamwo ika ir ra fokun tipachem. ³ Tirus a senätä tit mi pöchökül, a aioiätä silifer usun chök pwül moromor me kolt usun chök pwakaken lon ekewe al. ⁴ Nge ewe Samol epwe angei seni Tirus pisekin o aturätiau wöün lon ewe matau, nge ewe telinimw epwe karala. ✧

⁵ Lupwen ewe telinimw Askelon epwe küna ei, epwe niuokus. Kasa epwe pwal küna o eriköös ren an riaföü mi lapalap, pwal Ekron, pun an apilükülüköch epwe tala. Esap chüen wor eman king lon Kasa, nge Askelon esap chüen so. ⁶ Chon ekis repwe imweimw lon Astot. Iei alon ewe Samol mi Lapalap, “Ngang üpwe aükätiau än chon

✧ **9:1:** Ais 17.1-3; Jer 49.23-27; Am 1.3-5 ✧ **9:4:** Ais 23.1-18; Is 26.1-28.26; Sow 3.4-8; Am 1.9-10; Mat 11.21-22; Luk 10.13-14

Filistia lamalamtekia. ⁷ Resap chüen ochoch fituk mi cha ika mongö sokopaten mongö mi anioput ngeniei. Meinsin mi chüen manau repwe pachelong lon tettelin nei aramas pwe repwe usun chök eu eterekes me lon Juta. Pwal chon Ekron repwe pachelong lon tettelin nei aramas usun chök ekewe chon Jepus. ☆ ⁸ Mürin, üpwe püsin mamasa fanüei o apeti sounfu pwe resap pwere-long lon. Üsap chüen mwüt ngeni ekewe chon nemenem pöchökül pwe repwe ariaföüü nei aramas, pun üa püsin küna ren mesei usun ar riaföü.”

Ewe kingen Sion epwe feito

9.9-10

⁹ Oupwe fokun meseik, ämi aramasen Sion.

Oupwe akapwas fän pwapwa, ämi aramasen Jerusalem.

Nengeni, ämi King a feito remi.

A pwüng o pwora,

nge a tipetekison o wawa eman aas,

eman nienifön aas. ☆ ¹⁰ Ewe Samol mi Lapalap a apasa,

“Ngang üpwe ärala ekewe wokenin maun seni Israel

me ekewe orisin maun seni Jerusalem,

nge ekewe esefichin maun repwe ärela.

Ämi King epwe awora kinamwe ngeni chon ekewe mwü,

nge an nemenem epwe seni eu matau tori pwal eu,

☆ **9:7:** Ais 14.29-31; Jer 47.1-7; Is 25.15-17; Sow 3.4-8; Am 1.6-8; Sef 2.4-7 ☆ **9:9:** Mat 21.5; Joh 12.15

pwal seni ewe chanpupu Oifrat tori lesopun fanüfan.” ✨

Kot epwe aliwinisefäli chon Sion

9.11-17

¹¹ Iwe, ewe Samol mi Lapalap a apasa,
 “En Sion, pokiten ai we pwon ngonuk
 mi fis fän cha,
 üpwe angasala noum kewe chon fötek
 seni ar oola mi wewe ngeni eu pwang esap wor
 koluk lon.

¹² Oupwe liwiniti leniemi mi pöchökül,
 ämi chon fötek mi witiwit fän apilükülüköch.
 Iei üpwe asile ngenikemi pwe üpwe liwini
 ngenikemi
 feiöch fän ruu fän iten mine oua rieföü ren.

¹³ Üpwe nöünöü chon Juta usun efoch esefich,
 pwal chon Israel usun ekewe föün esefich.
 Üpwe nöünöü ekewe re Sion usun efoch ketilas,
 pwe üpwe maun ngeni ekewe re Kriis.”

¹⁴ Mürin, ewe Samol mi Lapalap epwe pwäto won
 nöün aramas,
 epwe esefichala nöün föün esefich usun chök inefi.
 Kot ewe Samol mi Lapalap epwe ettiki ewe rap-
 pwa
 o fetaleta lon ekewe mölümöl seni ör.

¹⁵ Ewe Samol mi Unusen Manaman epwe
 tümwünü nöün aramas.
 Nge ir repwe niela chon oputeer,
 repwe ün o akürang usun chokewe mi ün wain,
 repwe ur usun eu sepi souasor ra aea,
 lupwen ra äsupu chan ewe mönün asor

ngeni lepwokukun ewe rongen asor.

¹⁶ Lon ena fansoun ewe Samol mi Lapalap ar we
Kot epwe amanaua nöün aramas,
usun eman chon mas a amanaua nöün pwiin sip
seni feiengau.

Repwe molupolup lon fanüan
usun fau aüchea ra molupolup won epa
mwärämwär.

¹⁷ Ewe fanü epwe fokun mürina o ling.
Alüal me föpwül repwe märitä me lon fän pöchökül
ren wiich me wain.

10

Kot epwe amanaua nöün aramas

10.1–11.3

¹ Oupwe tüngorei ewe Samol mi Lapalap pwe
epwe apüngatiu ewe ütten leres lon fansoun. Ewe
Samol mi Lapalap mi föri ekewe kuchun üt epwe
fangeto ngeni aramas püngün üt pwe irä repwe
mär lon ekewe tanipi. ² Ekewe aramas ra kütta ar
alilis seni ekewe uluulun anün leimw me ekewe
soupwe, nge palüan me rer a chofana o lomoton-
gau. Ekewe soutan ra apworausä tan mi mwäl,
nge ar kapasen achipachip ra pön. Iei mine ekewe
aramas ra malechfeil usun sip, ra riaföü pokiten
esap wor ar chon mas. ☆

³ Ewe Samol mi Lapalap a apasa, “Üa fokun
song ngeni ekewe chon mas, üpwe apwüngü ekewe
souemwen. Pun ngang ewe Samol mi Unusen
Manaman, üpwe tümwünü nei sip ekewe chon Juta
o föri pwe repwe wewe ngeni nei orisin maun mi

☆ **10:2:** Mat 9.36; Mark 6.34

pöchökül. ⁴ Seni me leir epwe feito ewe föün lepwokuku me ewe chüföln imw mangaku, seni me leir epwe feito ewe föün esefichin maun me ekewe sounemenem meinsin. ⁵ Ir meinsin repwe usun chök mwän mi pöchökül lon maun, repwe purätiau chon ü ngeniir lon pwakaken ekewe al. Repwe maun, pun ewe Samol mi Lapalap a etiir, repwe pwal akufu ekewe chon oputer mi wawa oris.

⁶ Üpwe apöchöküla chon Juta,
üpwe amanaua chon Israel.

Üpwe aliwinisefäliir, pun ngang üa tongeer.
Ir repwe usun chök nge ngang üsap pöütirela,
pun ngang ewe Samol mi Lapalap ar we Kot
üpwe pälueni ar iotek.

⁷ Mürin, chon Israel repwe usun chök sounfiu mi
pöchökül,
repwe pwapwa usun aramas mi ün wain.
Nöür kewe repwe küna ei o meseik,
repwe ingemwareitiei ngang ewe Samol mi La-
palap.

⁸ Üpwe äkkänipöü nei aramas o amwichafengeniir.
Ngang üpwe amanaueer,
nge ir repwe chomong usun me mwan.

⁹ Inamwo ika üa atoropaseer lein chon ekewe
mwü,
nge ir repwe chechemeniei me lon ekewe fanü
toau.
Ir me nöür kewe repwe manau
o liwinisefäliti fanüer.

¹⁰ Ngang üpwe emwenireto seni ewe fanü Isip me
ewe fanü Asiria
o achufengeniir lon poputän fanüer.

Üpwe emwenirela ngeni ewe fanü Kiliat me Lep-
anon

tori unusen ewe fanü a ti rer.

¹¹ Iwe, repwe pwerela lon ewe matauen riaföü,
nge ngang ewe Samol mi Lapalap üpwe aluai ewe
matau

o apwasatä epilolun ewe chanpupu Nil.

Chon Asiria mi lamalamtekie repwe küna tekison,
nge än Isip nemenem epwe wesila.

¹² Ngang üpwe apöchöküla nei aramas,
nge ir repwe fel ngeniei o aleasochisiei.”

Ewe Samol mi Lapalap a kapas.

11

¹ Kopwe suki asamalapom kewe, en Lepanion,
pwe ewe ekkei epwe kenala om kewe setar.

² Oupwe ngüngüres, ämi kewe irä saipires,
pun ekewe setar ra turula,
nge ekewe irä mi pöchökül ra tala.

Oupwe ngüngüres, ämi kewe irä ook lon Pasan,
pun ewe wöllap a pöküpöküla.

³ Oupwe aüseling ngeni än ekewe chon mas
ngüngüres,

pun fanüer mi mürina, ia a wor ie enen man, a tala.

Oupwe aüseling ngeni
wörüwörün ekewe laion,
pun ewe wöllapen Jortan a tala.

Ekewe chon mas mi lomotongau

11.4-17

⁴ Iei alon ewe Samol mi Lapalap ai we Kot,
“Kopwe chon masen ekewe pwiin sip mi amol
ngeni ar repwe ninnila. ⁵ Chokewe mi möniir
repwe chök nirela, nge esap wor eman a
apwüngüür. Nge chokewe mi amömörela ra apasa,

‘Ousipwe mwareiti ewe Samol mi Lapalap, pun sa pisekisekila.’ Iwe, püsin ar kewe chon mas resap tongeer. ⁶ Iei alon ewe Samol mi Lapalap, “Üsap chüen tongei chon ei fanü. Üpwe föri pwe eman me eman aramas epwe tolong fän nemenien chon arun, pwal fän nemenien an king. Iwe, ir repwe ataela ewe fanü, nge ngang üsap angaseer seni lepöür.”

⁷ Iwe, ngang eman mi wisen masa ewe pwiin sip mi amol ngeni ar repwe ninnila fän iten chokewe mi kamö o amömöla sip. Iwe, üa angei ruofoch wok, efoch üa aita ngeni Ümöümöch, nge ewe efoch üa aita ngeni Tipeeufengen. Iwe, üa foleni ekewe sip. ⁸ Mürin, üa niela ülüman chon mas lon eu chök maram, pun üsap chüen tongeni engila ngeniir, nge pwal ir ra oputaei. ⁹ Mürin üa üreni ekewe pwiin sip, “Üsap chüen ämi chon mas. Mine a kan ngeni mäla, epwe mäla. Mine epwe ninnila, epwe ninnila. Nge chokewe mi chüen manau repwe nifengeniir.” ¹⁰ Iwe, üa angei woki we itan Ümöümöch o kupi. Ren ei üa ataela ewe pwon ewe Samol mi Lapalap a eäni ngeni chon ekewe mwü meininis. ¹¹ Iei usun ewe pwon a tala lon ewe rän. Nge ekewe chon kamö me amömö sip mi nenengeniei ra silei pweiei alon ewe Samol mi Lapalap. ¹² Mürin üa üreniir, “Are a pwüng me remi, oupwe ngenieiwini, nge are esap, oupwe chök amwöchü.” Iwe, ra ngenieiwini ukükün ilik föün moni silifer pweiwini. ¹³ Iwe, ewe Samol mi Lapalap a ürenieiwini, “Kopwe uwalong ewe silifer ren ewe chon för sepi seni pwül, ewe liwin mi fokun mürina ra aükü ngeni pwe ina ukükün aücheai.”

Iei mine üa angei ekewe ilik föün moni silifer o moneelong lon imwen ewe Samol mi Lapalap ren ewe chon för sepi seni pwül. ✧ ¹⁴ Mürin üa kupi aruofochun woki we itan Tipeeufengen. Ren ei üa ataela ewe pwipwifengen lefilen Juta me Israel.

¹⁵ Iwe, ewe Samol mi Lapalap a üreniei, “Kopwe wisenisefälä wisen eman chon mas, nge lon ei fansoun kopwe eman chon mas mi lomotongau. ¹⁶ Pun nengeni, üpwe seikätä eman chon mas won nei pwiin sip, eman esap ekieki chokewe mi pöütüla, ika kütta chokewe mi malechela, esap apöchöküla chokewe mi feiengau, ika amongöü chokewe mi chüen manau. Nge epwe ochei fituken chokewe mi kitinup o aserala küün pachapacher. ¹⁷ Feiengauen ei chon mas mi lomotongau a likitala ewe pwiin sip. Amwo ewe ketilas epwe pökü pöün me pelifichin mesan. Pöün epwe fokun pwasala, nge pelifichin mesan epwe wesewesen chunela.”

12

Jerusalem epwe ngasala lon kan fansoun repwe feito

12.1–13.6

Eu kapasen osuni: ¹ Iei ewe pworaus ewe Samol mi Lapalap a apasa fän äsengesin Israel. Iei alon ewe Samol mi Lapalap mi ameresala ekewe läng, ewe mi föri fanüfan o atolonga ewe ngasangasen manau lon aramas, ² “Nengeni, üpwe föri pwe Jerusalem epwe usun chök eu kapen wain. Chon ekewe mwü mi nom ünükün repwe ün seni o taroporop. Lupwen repwe pwelifeili Jerusalem

✧ **11:13:** Mat 27.9-10

fän pisekin maun, repwe pwal pwelifeili ekewe telinimwen Juta. ³ Lon ena fansoun, lupwen chon ekewe mwü meininis won fanüfan repwe mufengen o maun ngeni Jerusalem, üpwe föri pwe Jerusalem epwe wewe ngeni eföü fau mi fokun chou fän iter. Chokewe meininis mi ekietä ewe fau repwe püsin feiengau ren.” ⁴ Iei alon ewe Samol mi Lapalap, “Lon ena fansoun üpwe eniwokusu nöür kewe oris meininis o aumwesi chokewe mi wawa ekewe oris. Üpwe mamasaöchü ekewe chon Juta, nge üpwe ochuna nöün chon ekewe mwü kewe oris. ⁵ Mürin, chon ekewe eterekesin Juta repwe kapasfengen lefiler, ‘Ekewe chon Jerusalem ra pöchökül pokiten ewe Samol mi Unusen Manaman i ar we Kot.’ ⁶ Lon ena fansoun üpwe föri pwe ekewe eterekesin Juta repwe usun chök eu ekkei lon eu wöllap, ika usun chök efoch töl mi nget me lein pilükün wiich. Repwe arosala chon ekewe mwü meininis mi nom pwelin ünükür, nge chon Jerusalem repwe chök imweimw lon ar telinimw fän kinamwe.

⁷ Iwe, ngang ewe Samol mi Lapalap üpwe akomwen awinna ekewe chon Juta, pwe iteüöchün ekewe mwirimwirin Tafit me chon Jerusalem esap tekia seni iteüöchün chon Juta. ⁸ Lon ena fansoun ewe Samol mi Lapalap epwe tümwünü ekewe chon Jerusalem, pwe chokewe mi fokun apwangapwang repwe pöchökül usun chök Tafit, nge ekewe mwirimwirin Tafit repwe emweniir usun chök Kot, usun chök nöün ewe Samol mi Lapalap chon läng. ⁹ Lon ena fansoun üpwe arosala chon ekewe mwü meininis mi maun ngeni Jerusalem.

10 Üpwe tinato won ekewe mwirimwirin Tafit me chon Jerusalem eman ngün mi amefi ngeni aramas usun ewe ümömöchün Kot me eman ngün mi atufichiir lon ar iotek. Iwe, repwe nenengeni ätewe ra posu o ngüngüres won, usun eman a ngüngüres won nöün aleman, repwe kechüengau won, usun eman a kechüengau won nöün mwänichi. ☆ 11 Lon ena fansoun ewe ngüngüres lon Jerusalem epwe watte usun ewe ngüngüres fän iten Hatat-rimon me lon ewe maasiesin Mekito. 12 Iwe, chon ewe fanü repwe ngüngüres lon en me an famili. Ekewe famili ir mwirimwirin Tafit, ekewe mwän won ar, nge pwülüer won ar. Ekewe famili ir mwirimwirin Natan, ekewe mwän won ar, nge pwülüer won ar. 13 Ekewe famili ir mwirimwirin Lefi repwe ngüngüres, ekewe mwän won ar, nge pwülüer won ar. Ekewe famili ir mwirimwirin Simej, ekewe mwän won ar, nge pwülüer won ar. 14 Pwal ekewe lusun famili meinisin repwe ngüngüres, ekewe mwän won ar, nge pwülüer won ar.

13

1 Lon ena fansoun eu puächen koluk epwe puächetä fän iten ekewe mwirimwirin Tafit me chon Jerusalem, pwe epwe limetiir seni ar tipis me limengau.”

2 Iei alon ewe Samol mi Unusen Manaman, “Lon ena fansoun üpwe ärala iten ekewe uluulun anümwäl seni ewe fanü, pwe esap chüen wor eman epwe chechemeniir. Üpwe pwal asüela ekewe soufos me ekewe ngün mi limengau seni

☆ 12:10: Joh 19.37; Pwär 1.7

ewe fanü. ³ Nge ika eman a chüen osuni, püsin saman me inan repwe üreni, ‘Kopwe fokun nin- nila, pun ka apasa pwe om kapasen osuni a pop seni ewe Samol mi Lapalap, nge ka chofana.’ Püsin saman me inan repwe posu, lupwen a osuni. ⁴ Lon ena fansoun eman me eman soufos epwe säw ren püsin künan, lupwen a osuni, esap pwal chüen üföüf üfen soufos mi ülöül pwe epwe atupu aramas. ⁵ Nge epwe apasa, ‘Sap ngang eman soufos, nge üa eman soutanipi. Üa ngang won ei fanü seni lealüali.’ ⁶ Nge ika eman epwe aisini, ‘Met popun a kinas won sökürum?’, iwe, epwe pälüeni, ‘Eman a akinasaei me lon imwen chiechiei.’ ”

Nöün Kot chon mas a ninnila
13.7-9

⁷ Iei alon ewe Samol mi Unusen Manaman, “Kopwe pwök, en ketilas, o fiu ngeni nei chon mas, ngeni ewe aramas mi fokun kan ngeniei. Kopwe niela ewe chon mas, pwe ekewe sip repwe toropasfeil. Üpwe ü ngeni ekewe aramas mi kis. ✧ ⁸ Lon unusen ewe fanü ruu leülüngatin aramas repwe mäla, nge eu leülüngatin repwe manau. ⁹ Nge ewe eu leülüngatin mi chüen manau üpwe atolongeer lon ewe ekkeiin riaföü, pwe üpwe limetiir usun eman a limeti silifer lon ekkei, üpwe sotuniir usun eman a sotuni kolt won ekkei. Mürin repwe kökköri itei, nge ngang üpwe pälüeniir. Üpwe apasa, ‘Ämi nei aramas,’ nge ir repwe apasa, ‘Ewe Samol mi Lapalap i ach we Kot.’ ”

✧ 13:7: Mat 26.31; Mark 14.27

14

Chon Jerusalem me chon ekewe mwü

14.1-21

¹ Iwe, ränin än ewe Samol mi Lapalap apwüing a arapoto. Mürin, aramas repwe angei pisekimi chon Jerusalem fän pöchökül o aineti fän mesemi.

² Pun ewe Samol mi Lapalap epwe achufengeni chon ekewe mwü meinisin, pwe repwe feila Jerusalem o maun ngeni. Iwe, ewe telinimw epwe oola, repwe soläni pisekin lon ekewe imw o achomanauei ekewe fefin. Esopun chon ewe telinimw repwe oola, nge ekewe lusun aramas resap kärila seni lon ewe telinimw.

³ Mürin, ewe Samol mi Lapalap epwe feito o maun ngeni chon ekewe mwü, usun a fen föri lon fansoun maun.

⁴ Lon ena fansoun i epwe ütâ won ewe Chukun Olif mi nom mwen Jerusalem me peliötiu. Iwe, ewe Chukun Olif epwe mökfsen lon ruu kinikin seni ötiu tori lotou, pwe epwe fis eu lemol mi fokun chölap. Iei usun epek ewe chuk epwe sönüla ngeni peliefeng, nge epek ngeni peliör.

⁵ Nge ämi oupwe aleni ewe lemol le sü, pun ewe lemol mi fis lefilen ekewe chuk a tori Asel. Ewer, ämi oupwe sü usun ämi kewe lewo ra sü ren ewe chechekin fanü mi fis lon mwün Usia ewe kingen Juta. Mürin, ewe Samol mi Lapalap ai we Kot epwe feito, nge ekewe chon pin meinisin repwe eti.

⁶ Lon ena fansoun esap wor saram, esap fis patapat ika ais. ⁷ Epwe eu rän mi sokola, eu rän ewe Samol mi Lapalap echök a silei. Esap fis rän

ika pwin, nge lupwen fansoun lekuniol epwe wor saram. ☆

⁸ Lon ena fansoun kolukun manau epwe puwu seni lon Jerusalem, esop ewe koluk epwe pula ngeni ewe Setin Mäla mi nom ötiu, nge esop epwe pula ngeni ewe mataulap mi nom lotou. Ei epwe fifis lon fansoun pwichikar usun chök lon fansoun patapat. ⁹ Mürin, ewe Samol mi Lapalap epwe king won unusen fanüfan. Lon ena fansoun ewe Samol mi Lapalap epwe i chök Kot, itan chök epwe pwal föüla.

¹⁰ Iwe, unusen ewe fanü epwe siwil ngeni eu maasies seni Kepa mi nom efeng tori Rimon mi nom ör. Nge Jerusalem epwe tekia o nonom chök lon lenian seni ewe Asamalapen Peniamin tori lenien ewe aeuin asamalap, pwal tori ewe Asamalapen Pwokuku, pwal seni ewe imw tekia än Hananel tori än ewe king kewe lenien üchüch föün wain. ¹¹ Ewe telinimw epwe so, pun esap chüen wor anümanau won. Iwe, chon Jerusalem repwe imweimw lon fän kinamwe. ☆

¹² Iwe, ewe Samol mi Lapalap epwe awarato och mäfeiengau ngeni chon ekewe mwü meinsin mi maun ngeni Jerusalem. Epwe iei usun: Fituker epwe chök machela, lupwen ra chüen manau, föün meser epwe mach me lon pwanger, nge chönawer epwe pwal machela me lon awer. ¹³ Lon ena fansoun ewe Samol mi Lapalap epwe awarato wor fitikoko me niuokus watte, pwe eman me eman epwe turufi chienan o fiu ngeni. ¹⁴ Pwal chon Juta repwe maun ngeni chon ekewe mwü

☆ **14:7:** Is 47.1; Joh 7.38; Pwär 22.1 ☆ **14:11:** Pwär 22.3

me lon Jerusalem. Repwe angei wöün chon ekewe mwü mi nom ünükür pwe choon wokur: kolt, silifer me chomong üf. ¹⁵ Iwe, eu mäfeingau usun mesemwan epwe pwal tori ekewe oris, ekewe sokopaten aas, ekewe kamel, ekewe aas me sokopaten man mi nom lon ekewe lenien sounfiu.

¹⁶ Mürin, meinisin mi chüen manau me lein chon ekewe mwü mi maun ngeni Jerusalem repwe feila Jerusalem iteiten ier pwe repwe fel ngeni ewe King, ewe Samol mi Unusen Manaman, o eti ewe chulapen likachoch. ☆ ¹⁷ Nge ika chon eu mwü me won fanüfan resap mochen feila Jerusalem pwe repwe fel ngeni ewe King, ewe Samol mi Unusen Manaman, esap püngütü üt wor. ¹⁸ Are ekewe chon Isip resap mochen feila o eti ewe chulapen likachoch, esap püngütü üt wor. Ewe Samol mi Lapalap epwe awarato wor ewe feingau a awarato won chon ekewe mwü resap mochen feila Jerusalem pwe repwe eti ewe chulapen likachoch. ¹⁹ Epwe iei ewe apwüing ngeni Isip, pwal ngeni chon ekewe mwü meinisin resap feila Jerusalem, pwe repwe eti ewe chulapen likachoch.

²⁰ Lon ena fansoun epwe rup won ekewe pel fän üen ekewe oris ekei kapas, “A pin fän iten ewe Samol mi Lapalap.” Iwe, ekewe nape lon imwen ewe Samol mi Lapalap repwe pin usun chök ekewe sepi mi nom mwen ewe rongen asor.

²¹ Iwe, iteiten nape me lon Jerusalem me Juta repwe pin fän iten ewe Samol mi Unusen Manaman, pwe meinisin mi asor repwe feito o aea ekewe nape le kuku fituken ekewe mönün asor

☆ **14:16:** Lif 23.39-43

lor. Lon ena fansoun esap chüen wor eman chon amömö lon inwen ewe Samol mi Unusen Manaman.

Paipel
The Holy Bible in the Chuukese language of the
Federated States of Micronesia

copyright © 1984, 1989, 1991, 2001 Liebenzel Mission

Language: Chuukese

Translation by: Liebenzell Mission

Old Testament © 1989, 2001 Liebenzel Mission New Testament © 1984, 1991
Liebenzel Mission

This translation is made available to you under the terms of the Creative
Commons Attribution-No Derivatives license 4.0.

You may share and redistribute this Bible translation or extracts from it in
any format, provided that:

You include the above copyright and source information.

You do not make any derivative works that change any of the actual
words or punctuation of the Scriptures.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2020-02-11

PDF generated using Haiola and XeLaTeX on 11 Nov 2022 from source files
dated 30 Nov 2021

c48fdfd7-5e91-508c-a792-018261cf838c